

Verena Diener – presidenta dal Fond svizzer per la cuntrada FSC

Il cussegl federal ha elegì il nov presidi dal FSC e dus novs commembers da la cumissiun

■ (cp) Il cussegl federal ha elegì Verena Diener, l'anteriura cussegliera naziunala, cussegliera governativa e cussegliera dals chantuns turitgais a la testa dal Fond svizzer per la cuntrada FSC. Ella daventa la successura da Marc F. Suter che sa retira la fin da l'onn pervia da la limitaziun dal temp d'uffizi da 13 onns da la cumissiun dal FSC. Novs commembers da quest organ directiv federal da 13 personas èn a partir dal 2017 il biolog lucernais *Thomas Stirnimann* ed il pur da bio grischun *Hansjörg Hassler* ch'è a medem temp era gist vegnì elegì sco nov vicepresidente dal FSC.

A chaschun da la festa da giubileum da 700 onns confederaziun ha il parlament svizzer fundà l'onn 1991 il Fond svizzer per la cuntrada FSC cun l'intent da sustegnair premuras concretas per mantegnair, revalitar e restaurar cuntradas cultivadas en accord cun la natira. Sco instrument da promoziun da la confederaziun independent da l'administraziun ha il FSC pudì sustegnair fin ussa passa 2400 projects locals e regiunals en tut las cuntradas dal pajais cun var 142 milliuns francs. Davart la concessiun da contribuziuns decida la cumissiun dal FSC ch'il cussegl federal elegia e che sa cumpona da spezialists da differentas disciplinas.

Il president partent Marc F. Suter fa ina bilantscha positiva

Cun l'elecziun da Verena Diener sco nova presidenta dal FSC datti pir la terza giada en ils 25 onns da sia existenza ina midada a la testa dal FSC: Ils emprims dudesch onns ha l'anteriur cusseglier naziunal e cusseglier dals chantuns songagliais *Eugen David* presidià il FSC. Dapi il 2004 è l'advocat ed anteriur cusseglier naziunal *Marc F. Suter* (Tüscherz-Alfermée) president dal FSC. Era grazia a ses entusiassem per bellas cuntradas, ses inschign operativ e ses flair per decisiuns gistas han il cussegl naziunal ed il cussegl dals chantuns prolungà las basas legalas dal FSC per in ulteriur decenni fin la mesadad dal 2021 e mess a disposiziun per la terza giada 50 milliuns francs. Durant ses temp d'uffizi ha il FSC pudì sustegnair circa 1460 projects da cuntradas cun var 70 milliuns francs. Il president dal FSC Suter fa ina bilantscha positiva: Il Fond svizzer per la cuntrada saja ina «istorgia da success» ed exprimia «l'amur per la patria e per la varietad impressiunanta da las cuntradas cultivadas en noss pajais».



Sco novs commembers da la cumissiun FSC ha il cussegl federal elegì per l'entschatta dal 2017 enfin la fin da la durada d'uffizi currenta (2019) Hansjörg Hassler da Donat che daventa era gist vicepresidente.

KEYSTONE

L'elecziun da Verena Diener sco buna ensaina per l'avegnir dal FSC

A partir dal 1. da schaner 2017 surpiglia la vicepresidente actuala Verena Diener la direcziun dal FSC. La nova presidenta dal FSC è stada da la partida sco giuvna cussegliera naziunala cura ch'il FSC è vegnì fundà il 1991 sco regal dal parlament per il giubileum da 700 onns confederaziun. Sco presidenta dal Rheinaubund s'engaschava ella gia da lez temp per il mantegniment da cuntradas periclitadas. Ils onns 1995 fin 2007 è Diener stada commembra da la regenza chantunala turitgaisa e s'enter cussegliera dals chantuns fin il 2015. Sco vicepresidente è ella sa famigliarisada durant in onn cun la moda da lavurar dal FSC ed ha visità projects sustegnids. Ella sa legra ch'ella «dastga gidar a furmar il destin da quest instrument da promoziun unic e preparar il terren per in avegnir garantì speranza a lunga vista».

Hansjörg Hassler e Thomas Stirnimann da nov en la cumissiun

Per motivs da la limitaziun dal temp d'uffizi parta ultra dal president Marc F. Suter in ulteriur commember da la cumissiun la fin dal 2016: *Joachim Kleiner*, professor da furmaziun da la cuntrada a la Scuola auta da tecnica Rapperswil HSR. Sco commember da la cumissiun dapi il 2003, accumpagnader professiu-

nal da 140 projects sustegnids, cunresponsabel da la campagna d'aleas e manader d'ina grupp da lavur davart il tema ur d'abitadis ha el marcà fermamain il FSC ils ultims onns.

Sco novs commembers da la cumissiun FSC ha il cussegl federal elegì per l'entschatta dal 2017 enfin la fin da la durada d'uffizi currenta (2019):

– Hansjörg Hassler, Donat GR, è stà cusseglier naziunal grischun ils onns 1999 fin 2015. El ha grondas experientschas professionalas sco pur da muntogna, è stà president da l'Uniun purila grischuna e da la Societad svizra d'economia alpestra sco era commember da la suprastanza da la Grupp svizra per las regiuns da muntogna e da l'Uniun purila svizra. Sco president dal Parc natural regional Beverin enconuscha el las stentas actualas per mantegnair e valutar la natira e cuntrada.

– Thomas Stirnimann, Emmenbrücke LU, ha studegià biologia a la SPF/ETH Turitg e s'enter lavurà ils onns 1986 fin 1991 en in biro privat per l'ambient. Dapi il 1991 lavura el sco spezialist per la natira e la cuntrada tar il chantun Lucerna, dapi il 2011 sco vicemanager da la partiziun natira, chatscha e pestga. En la Conferenza dals delegads chantunals per la protecziun da la natira e la cuntrada (KBNL) collavura el sco vicemanager da fatschenta.